

ARLEF: L'IMNI DE FIESTE DE PATRIE DAL FRIÛL AL DARÀ LA CJARIE AL UDIN

Proiezion dal video in anteprime, domenie ai 3 di Avrîl, prime de disfide cul Napoli, al Stadi Friûl

Il zâl e il blu de bandiere de **Patrie dal Friûl** (acuile zale in cjamp blu), par plui di dôs oris a puartaran colôr e vivarositàt ae anteprime de impuartante **disfide Udinese - Napoli**, al Stadi Friûl, che si zuiarà **domenie ai 3 di Avrîl** (939° aniversari de nassite de Patrie dal Friûl), in graciis di une iniziative volude de **ARLeF** - Agenzie Regjonâl pe Lenghe Furlane e condvidude de **Societât blancje e nere**.

Des 10.30 di buinore, a pene che il stadi al vierzarà, fin aes 12.30, moment de sivilade di principi de partite, l'animadôr dal stadi Poma (Alessandro Pomarè) e Dj Tubet, il famôs rapper furlan, a proponaran une vivarose animazion bilengâl par preparâ i 25.000 tifôs a un vêr e propri event: la proiezion, in anteprime (ancje se cuasi in contemporanie cun chês leade aes celebrazions uficiâls de Fieste, a Gardiscje), dal video realizât dal regjist monfalconês, Massimo Racozi, su lis notis e lis peraulis dal imni "uficiâl" de Fieste de Patrie "No sta a contâmi dome chês storie", scrit e interpretât di Dj Tubet compagnât di Camilla Grassi.

«La idee di cheste "incursion" culturâl e linguistiche in ambit sportîf e je stade daurman cjapade sù dal Udin – al dîs Lorenzo Fabbro, president de ARLeF -. La societât e je daûr a cirî gnovis strategiis par creâ leams plui fuarts tra la scuadre, i tifôs e il teritori e, in gracie ancje dal protocol di intese firmât cualchi mês indaûr cul Comun di Udin e la Agenzie, il Stadi al deventarà simpri plui european cuntune caraterizazion plurilengâl».

Dilunc de animazion, i tifôs presints al Stadi a saran cjapâts dentri in zûcs e situacions di freestyle par furlan intant che sui megaschermis a vignaran proietadis slide e video che a esaltin lis gloriis sportivis dal Udin ("Alè Udin", di Dj Tubet) e che, come za scrit, a memorein la Fieste de Patrie dal Friûl (1077-2016). Te jerbe, dongje dai doi animadôrs, a saran presints il president de ARLeF, Lorenzo Fabbro e Massim Racozi, cui siei colaboradôrs. Daspò al fevelarà il cjamp.

Udin, al 1 di Avrîl dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<